

Yucanbe
yachi Seiton Ocolabe

Iclesia Jesús Miya
1.992

YUCANBE YACHI SEITON OCOLABE

¿Yucan mowan? ¿Niyaque mantamin jun?

Yucan Jesucristobe penenatuminlachi
miya joe.

Yucan Jesucristobe penenaminlachi
tenchiri tinantiya itoe.

Diosichi Pilabi itsanque chuteca joe:

(Diosichi fiqica) meráinla seiton tenca
canunca purato, sen tenca mancalaquichunae.
Satanachi mantabi nechí loto, Diosi
mantananun tsachi bolonbi manwilaichunae.
(Mantá Tanla 26:18)

Yucanni Diosica tennatuminlaca mantamin
joe. (Juan 16:11)

Chiquilachi tencabi yucanbe mantainato,
nemen cuwenta jominlayoe. Junni tsan
jominlaca Apa Diosi chiquilaca manse larito,
yachi laquiranun Nao mantananun tsachi
bolonbi penenasa carinue. (Colósalachi 1:13)

Ya pilaca quirato itsanque miintsan joe:

Jeralela casale yucan mantananun bolonbi
jolajoe. Juntonan Jesucristobe cayaiminlari
jun bolonbi nechí loto, Diosi mantananun
tsachi bolonbi wicala joe. Junni yucanni
yalaca natiya mantá itoe.

Yucanchi cobierno tsachi cobierno cuwenta joe. Tsachi cobiernobi presidente, ministro, alcalde, jefe político, comisario, titiya joe. Weyanlari fécarí mantá talarae; weyanlari nanni pele mantá talarae. O ejersitoca tenca cade! Ejercitobi jenerali coronelilaca mantamin joe, coroneliri capitanlaca mantamin joe, capitanni sarjentolaca mantamin joe, sarjentori soldadolaca mantamin joe. Junni yucanchi seiton ocola tala jun cuwenta joe.

Diosichi Pilabi itsanque chuteca joe:

Diosi Cristobe mantá tan anjelilaca, mantá tan ocolaca, junsí yala tala miyalaca jera fe loto epe jera suwanue. Cristo corosibi puyacachi yalaca fe loto lucarinue jeralela quiralaquinasa. (Colósalachi 2:15)

Junni yucanchi seiton ocola talanan weyanlari duque mantá tanla joe weyan yucan ocolaca mantachun. Weyanla mantimini duque mantá itolajoe. Yala tala fécarí mantá tanni yucan patsa joe. Junni fécarí mantá iton yucanchi ocolari jotonan, tsachilaca fe sonban jolajochunae. Juntonan Diosichi tsachilari Diosichi sonbabe yucanchi seiton ocolaca fe sonban jolajoyoe.

**Junni yucan Diosichi tsachilaca mantá itotori,
¿niyan quito yalaca seiton quisa carimin jun?**

Tenca calaquede! Yucan Diosichi tsachilaca natiya mantá itotonan, yalaca mantaquiniquimin joe. ¿Niyaito tsan jun? ¿Niyaito Diosichi tsachilaca seiton quimin jun? ¿Niyán quito Diosichi tsachilaca pasuwanin jun?

Ya panhacaca manpachun, man fiquicari
pano joe: **yucan encanaquimin joe.**

Diosichi Pilabi itsanque chuteca joe:
(Yucan) tsarasica patumin joto, nenesiri
pamin joto, tsarasica panunca pa joe.
Nene pamin jotonan, nenenan pasa carimin
joe. Ya nene pánato, yachi mite
nenanirae. (Juan 8:44)

Yucan jeralesaca encanato jutsa quisa
carimin joe. (Quirajanunca 12:9)

(Weyan tsachila) encanamin yucanchi
ocolaca quereilaichunae tica joe. Yucanchi
ocola micarica fiquica meralaquichunae tica
joe. (Benete Timotéochi 4:1)

Junni yucan nene pacachi tsachilaca yucapiyari-
min joe. Yari mantá tan itotonan, nuca mantano
derecho itotonan, nuca mantaquechique
tenfechunae. Junni nuri yaca quereinari, ya
pacaca tsabi canari, yaca meránari, nuca miya
cuwenta mantaquiniquichunae.

Diosichi Pilabi itsanque chuteca joe:
Tenca calaquede! Peyunla cuwenta jolajo-
chunae. Nula tilabetiya mantainari, ya
nulachi patrón jochunae. Jutsabe mantaitori,
jutsachi peyun jochunae. (Románolachi 6:16)

Jun tsanquenán yucanbe mantaitori, yachi peyun
cuwenta manjochunae nuca mantá itosatiya.
Yucanla nene paminla joe. Nene pato mantaminla
joe. Nene pato payiminla joe yape nu encanaito,
yala mantá talaraeque tenca casa.

Aman in comparasionca tenca cade!

Feto manca polisia jominnan manlochunae. Seiton quica jonan, polisia mantaminla yaca quepoto laricala jochunae. Junni yari yachi unica uniformeca poto, comunaca jato policia joyoe tito mantachunae. Seitonque mantachunae. Junni tsachilari encanaito, polisia cajoeque tenca cato, yaca obedeseilaichunae. Manan manca tsachi mantimini mirachunae yari amana mate polisia itoeque. Junni ya tsachiri mantá itoeque mirato, ya epe polisiaca tennatuchunae. Obedeseituchunae. Encanaica junlacasiri mantano podeichunae. Junni yucan ya polisia cuwenta joe.

O manca comparasionca tenca cade!

Sen postoca jichun, tsachila na foro minuse polenola joe. Junni jun minubi manchi manchi quela tsolarachunae. Junni sen postoca jichun, ya duque quela quitsase poleno joe. Junni quelari tsachilaca poletusa carichique tenfeminla joe. Juntonan quelaca cadenachi teleca jolajoe. Telecala joto, quitsase polenaminlaca quello fétonan, cano podeilaituchunae. Nin tewewechi, nin tefunchi cano podeilaituchunae. Aticari a tino podeiminla joe. Duque papun jolajoe. Duque tenfeminla joe jun tsachica junse polesa carituchique. Polenaminca totechique duque tenfemin joe. Juntonan polenaminca natiya cano podeilaituchunae. Junni duque atimin joe yape tsachilari yaca jelechi

polelaitusa. Tsachilaca encanaquechique
tenfeminla joe yape totechunaeque tenca
calaquisa. Junni weyan tsachilari polelai-
tuchunae quela cachunaeque jelechi.
Encanaito, jele tito, jituminla joe. Weyanla
mantimini encanaituto poleniiminla joe.
Quela cano podeituchunaeque mirato, jele
tituto polenilaichunae. Junni yucanlari ya
quela cuwenta jolajoe.

**Junni Diosichi Tenca lachibi chumari, ¿niyaito
yucan quelo ino podeichunan, laca encanachun?**

Manca comparasionca tenca cade!

Nuchi awinta serica cuwenta jochunae.
Nuchi tencari jera sen josanan, ya serica
sen jochunae. Foro itochunae. Junni yucanla
nuca encanaquebi wino podeichun, jun
sericabi cumana postoca neyano joe. Junni
yucan nuchibi cumana postoca neyamin joe.

**¿Junni yucan tile, o numasi, cumana postoca
fehunan?**

1 - Weyante puca cumana josanan yucan pasuwamin
joe. Yucan Jesucristocanan tsanque pasuwanue.
Inca tenca cade!

Diosichi Pilabi itsanque chuteca joe:

(Jesucristo) junpalu chunca ma (ano
fitunca) chusa, ano duque muquinaminue.
Junni yucan seiton quisa carichi tide janue.
Junni yucan yabe itsantinue: Nuri Diosichi
Nao jotori, in suca bibu suwade! (Mateo 4:3)

Jesucristo cuarenta ma fecári ano fitunca joto, yachi puca duque cumana jominue. Junni ya cumana órate yucan yaca pasuwabi janue. Pansile chiquilachicanan cumana órate janiichunae.

2 - Yucan chiquilachibi quello fachun, chiquilachi tenca cumana jono órate fécari pasuwamin joe.

¿Junni chiquilachi sericabi niya jonan cumana posto ichunan? Peman cosa jochunae:

1 - Jutsa quinari, o Diosica merátuchi tinari, nuchi sericabi cumana posto jochunae, Yucan itsantichunae: "Quirade! Nu Diosichi tsachi itoe. Lachi tsachi joe. Junto laca obedeseide!" tichunae.

2 - Tsachilaca perdonaitunari, nuchi serica tsanbi duque cumana posto ichunae yape yucan wino podeisa.

3 - Junsi pone quicaca tenca cade! Yari duque duque pelicroso joe. Diosi pone cosa quinanunca duque pa joe. Pone oculari yucanchi ocola jolajoe. Ya ocolabe nenatori, ya ocolacanan meráno patilaichunae. Ya ocolabe ayudaisa panhaca jonari, yalari nuca mantano munaralarachunae.

Jun tenchi ponelalari Jesucristobe penenano munaralaranari duque duque tenfe joe. Yalaca, junsi yalachi nalalacanan, yucanchi ocola duque pasuwaminla joe yalaca tsacuminla jolajoyoe tito.

Jun tenchi Mantobi iclesialabi duque problema joe. Uyan pueblolabe quirachun, Mantobi chumin pastorila, ansianola titiya fécari duque problema talarae. Manto quelole duque ponelala jonan, inte duque yucanchi ocola nenaminla joe. Jun tenchi fécari duque problema joe.

Junni tenca cade! ¿Nu Jesucristobe penenamin jotonan, ti quica jomanyun?

¿Ponebe janpeica jomanyun?
¿Suerte posa carica jomanyun?
¿Poneca miisa carica jomanyun?
¿San Gonzalftochica jica jomanyun?
¿Sinusa carica jomanyun ococa suerechun?

Nu tsan cosa quica jonari, nuchi sericabi wa foro jochunae yucan wisa. Nuri yaca "Wiyaniide!" tinaminue. Junni tsan cosa quinari, yucan itsantichunae: "Quirade! Nu Diosica quereitumin joe. Laca quereimin joe" tichunae.

Junni yucanchi ocola nasi wisi, ¿niyan quiminla jun? Peman cosa quiminla joe.

1 - Tranpa quimin joe. Sen cosa quisa tichunae. Junni ya sen cosa quinato, jutsacanan quino patichunae. Dila cuwenta jochunae. Dilabi sen cosalaca pomanhe animala fibi jato cayaisa.

Junni yari seiton cosa itochunae. Sen cosa jochunae. Pansile ano o tsachica o mulu jochunae. Junni animaliri ya senca finaminca dila camin joe. Junni yucan jun tsannan quimin joe. Tsanque tsachilaca camin joe. Ejenplo quiralaquisa!

Yucan Evabe cuenta quito itsantinue: "Ja pelebi pucaca fitori, nula miilaichunae. Junsi Diosi cuwenta jolajochunae." Junni miino sen joe. Jutsa itoe. Junsi Diosi cuwenta jono sen joe. Jutsa itoe. Juntonan ya cosa cachun Diosi mantacaca merátuto fitunun pucaca fino jominue. Yari jutsa jominue.

Jesucristo cuarenta ma fecári ano fitunca josanan duque ano muquinaminue. Junni yucan yabe cuenta quito, in suca bibu suwato fide! tinue. Junni bibu quito finori jutsa itoe. Junni jun bibu quichun, yucanchi mantate quino jomin jonhoe. Yari jutsa jono jomin jonhoe.

Yucan tsachilabe cuenta quito, "Futbol quebi jide!" o "Boli quebi jide!" timin joe. Aman deporte jutsa itoe. Sen joe. Juntonan boli quebi jitori duque wanhito cultocanan jino podeituchunae. Yari duque seitochunae. Junni yucanni "Boli quebi jide!" tito, cultoca jitusa carichunni tsantinae.

Yucan tsachilabe cuenta quito, "Nalalachi fiestaca quirabi jide!" tichunae. Yucanni mirae nalala manjilainunbi uwanlari quitsa quepen fecári fiesta quito winan ilaichunae.

¿Jutsaca casticaquino jotun? Casticaquino joda. Junni manca comunero nuca seiton quinari, yucan itsantichunae: "Yari nuca seiton quinun tenchi casticaino joe. Junni nuri natiya perdonaituto, yaca jeralalabe seitonheque cuenta polaride nenade! tichunae yape jun fiquibe padeseisa." Diosi mantimin nuca numa mantaca joe jeralalaca perдонаideque.

2 - Yucanla nene pato, nuca seiton joyoeque tenca casa carilaquichunae. Nuri ya nene fiquibe encanaitori, natiya podeitioyeque, uyanla cuwenta poden itoyoeque, duque epe joyoeque tenca cachunae. Yucanla nube itsanlatichunae:

Nuchi jutsa tsaracari wa jutsa jonan,
perdonaituntsan joe tichunae.

Nu cultoca jinatotiya fe sen tsachi ituchunae.
Ayudaituchunae. Junnan jituntsan joe tichunae.

Diosi nuca laquiratue. Nu Diosichi na itoe
tichunae.

3 - Junsi yucan nene pato, nuca duque sen joyoeque tenca casa carichunae. Nuri ya nene fiquibe encanaitori, uyanlaca fe joyoeque, uyanla cuwenta cumana tenca itoyoeque, duque poden joyoeque tenca cachunae. Junni yucan nube itsantichunae:

Nuchi jutsa na nacari jonan, perdon farino
munaratue tichunae.

Cultobi layaiminla weyanlari duque seiton
jolajoe. Junni tsanlabe layaituchun, cultoca
jituntsan joe tichunae.

Cultoca jiminlari nu cuwenta itolajoe. Yalari
cumana tenca jolajoe. Junni nu yala cuwenta
itoto, nuri cultoca jino itoe tichunae.

Junni tencabe nenano joe nuchi serica tsanbi
foro itosa, yape yucanla pasuwabi wino
podeilaitusa.

**Junni yucan wito nuca jutsa quisa carichique
tenfenasanan, nuri peleito jutsa quinumsi, ¿yucan
niyan tichuman?**

Diosichi Pilabi junca itsantie:

Yucan chiquilachi acolaca culpa quimin
jominhe. Yalaca quepen, malon chiquilachi
Diosichi cate culpa quimin jominhe.
(Quirajanunca 12:10)

Junni yucan nube itsantichunae:

¿Nu Diosichi na joyoe titonan, yaca merátuto
jutsa quico? tichunae.

Nu jutsa quinun tenchi Diosi nuca perdonaino
itoe; nuca casticaquino joe tichunae.

Laca obedeseie tichunae. Tsanque miintsan joe
tichunae la Diosica fe sonban joeque.

Junni nuri yucan tsantinaminca quereitori, . . .

Pele tenca ichunae. Junni nuri itsanque tenca cachunae: ¿Ti quichun seque nenano tenfeno join? Podeitioeque tenca cachunae.

Lu ichunae. Familialabe, junsi Jesucristobe penenaminlabenan, lu ichunae. Yalasiri nuca ayundaino podenla joe. Tsan josanan nuri yalabe lurato joque ichunae.

Jele tichunae. Adán jutsa quica joto Diosi witabi nenaminca meráto, "Jele tiyoe" tinue. (Caque cosala 3:10) Man postobi Diosichi Pilabi itsanque chuteca joe:

Tsachilari puyano joyoeque jele tenca cato, puyano fecári yucanchi peyunla cuwenta jolajoe. (Israelftalachi 2:15)

Puyanoca, yucanchi ninca, Diosi casticaquino jonunca jele tichunae. Tsanque nenaminla duque laqui joto, duque padeseito nenaminla joe.

¿Junni niyaito isaino jochuman yucan wito tsancari yucapiyaritusa? ¿Ti quino jum, nuchi serica tsanbi foro itosa?

Tsa jonumcasiri quereintsan joe.

Tsa pacaca quereino joe.

Nene pacaca quereituntsan joe.

Tsarasi fiquica tsabi cantsan joe.

Nene fiquibe encanaituntsan joe.

Diosi pacaca tsa joeque quereino joe.

Yucan pacaca nene joeque tenhintsan joe.

Diosichi Pilabi itsanque chuteca joe:

Yucan (seitonlaca) caya joe yape yabe mantailaisa. Junni Diosi ayudainan, manlono podeilaichunae. Seiton fiquica telaquepoto, casan tenca mancato, Diosichi tsarasi paca fiquica miino podeilaichunae. (Benete Timotéochi 2:25-26)

Tsarasi fiquica miitobi, uyanlachi peyun cuwenta natiya itolajochunae. (Juan 8:32)

Tsanque joe: Tsarasi fiquica mirato quereitori, yucanchi peyun cuwenta itochunae. Serica tsanbi foro itochunae. Libre jochunae.

¿Junni Diosichi tsarasi fiqiri niyan tin?

¿Nuca niyan tin? ¿Yucanca niyan tin?

¿Junsi Jesucristoca niyan tin?

Nu Jesucristobe tsa cayaica jonari,
DIOSICHI PILABI NUCA ITSANTINAE:

Chiquila Crístochoi tsachila joto, Diosichi to tsachila jolajoyoe. Junsi chiquilachi tenchi duque seca joe. Diosiri toca caquituminnan chiquilaca, yaca quereino junlaca, wenteca jominue. Chiquilaca wenteca jominue yape yachi cate ti culpa natiya iton nenalarasa. Chiquila na caitusanan, Apa Diosi chiquilaca duque laquirato wentenue yape Jesucristoca quereiminla joto Diosichi nalala cuwenta jolajosa. Diosi yachi tenca munate tenca cato, chiquilaca yachi nalala jolajochunae tinue. Chiquila Diosichi munatinun Naochi tsachila jonan, Diosi chiquilaca duque laquirato, senla joe timinhe. (Efésolachi 1:3-6)

Junni chiquila Jesucristochi jonun tenchi
Diosi chiquilaca Cristobe mansonha carito,
Cristobe pechumin cuwenta suwanue. Diosichi
to tsachila joto, Cristochi tsa tede nanchi
pechumin cuwenta jolajoyoe. Jesucristobe
pechumin cuwenta suwanue yape uyanlanan
tenhilaisa ya duque laquiramin joeque.
Numatotiya junca quirawonato polechunae.
(Efésolachi 2:6-7)

Junni Diosi chiquilaca duque laquirato fe losa
carica joe. Junni Diosi yucanlaccanan junca
tenhisa carinae. Nu Diosichi tsachi joe (tsa
cayaica jotori). Junni Diosichi tsachilari
Cristobe jerale toca mantalaquichunae.
Cristochi tsachila yucanca fe jolajoe
Diosichi sonbabe.

DIOSICHI PILABI YUCANCA ITSANTINAE:

Nene pamin joe. Totemin joe. Junni quera
quinaminnan numa perdeica joe.

Diosichi Pilabi itsanque chutecca joe:
Yucanni Diosica tennatuminlaca mantamin
joe. Junni Diosi yaca culpa tae tito,
casticaquintsan joe tichunae. (Juan 16:11)

Jesucristo corosibi puyato yucanca tsanle fe
lonue. Junni yucan perdeica joe. Quepoica
joe. Yari tefun iton quela cuwenta joe. Janpe
iton tsa pini cuwenta joe.

Suriname tobi manca diosi tinun moldeca
quirayoe. Ya moldeca tennaminlari laca
sonba payilaquee yaca foto laritunaque. Foto
larinari, yalari natiya paitulajoanae
tilatie. Juntonan ya molde patsanan laca
duque paito, yucaquito puyasa carichinae
tilatie. Junni lari miramanyoe ya diosi
tinun molde yucanchi joeque. Ya diosi
tinunni yucanchi seiton oco joeque
miramanyoe. Junsi miramanyoe lachi tencabi
Diosichi Tenca chueque. Junni foto
lariniquiyoe micuwachun ya yucanchi ococa
jeleratियोeque. Ya diosi tinun moldeca
tennaminlari lachi tenchi duque wepananamin-
lanue puyachinaeque. La mantimini wepana-
tiyoe Diosi yucanca fe loca joeque mirato.

DIOSICHI PILABI JESUCRISTOCA ITSANTINAE:

Yucanca fe loca joe. Nuca laquirae.

Diosichi Pilabi itsanque chuteca joe:

Cristo chiquilaca laquirachunae.

Anjelila, yucanchi ocola, uyan mantá tanla,
jamochi chuminla, o to tenpe (yucanchibi)
chuminla niyanlaquinasatiya Diosi chiquilaca
calaquirachunae. Chiquilachi Miya Jesucris-
tochi tsachilaca Diosi laquirachunae. Junni
monantiya yaca laquiraminca desuwano
podeilaituchunae. (Románolachi 8:38-39)

Diosichi Nao yucan seiton suwacaca manse
suwabi patanue. (Caque Juanchi 3:8)

Cristo corosibi puyacachi (yucanchi seiton
ocolaca) fe loto lucarinue.
(Colósalachi 2:15)

Jesucristo yabe penenano munaraminlaca numanan
telaquepotuanae tinue. Cristo jerale yucanchi
seiton ocolaca fe lonue.

JUNNI PEMAN COSACA SEQUE TENCA CATO,
NATIYA PANSITUNA!

- 1 - Nu Diosichi na joto,
yucanca jelerano itoe.
- 2 - Yucan numa perdeica joto,
nuca mantano derecho itoe.
- 3 - Jesucristo yucanlaca fe loto,
nuca laquirato fe lomiyachunae.

Ya peman cosaca tsa quereintsan joe.

**¿Junni Diosichi tsarasi fiquica tsa quereitori,
nu niyan ichun?**

Nuchi serica tsanbi foro itochunae.

- Yucanchi ocolaca quepente quiraichunaeque
nantari jeleratuchunae.
- Yuca quicaca jeleratuchunae.
- Yucanchi ninca jinoca jeleratuchunae.
- Diosichi tsachi itoyoeque natiya
jeleratuchunae.
- Yucan nuca quiyanpun suwachunaeque
jeleratuchunae.

¿Junni ti quintsan jun?

Pansile nuri in fiqica "Duque se joe" tichunae. "Tsanhino munarayoe" tichunae. Tsanque tenca catori, ¿ti quino joyun? Peman cosa quino joe.

1 - DIOSIBE cuenta quintsan joe. Perdón panhano joe yucanchi seiton ocolaca tennamin jonun tenchi. Yucanchi seiton ocolaca tennan, o yalaca querein, o yalaca obedesein, o pone su ocobe janpein, o ti uyan yucanchi cosalaca quica jotori, Diosibe rocaino joe nuca perdonaisa.

2 - YUCANCHI SEITON OCOLABE cuenta quintsan joe. Yalabe rocaino itoe. Yalabe panhano itoe. Yalaca mantano joe. Nu mantá tae yalaca mantano podeichun. Yalaca mantato, Manjilaide! tino joe. Joqueilaide! Jachi we manjide!" tino joe. Jesucristonan yucanbe cuenta quito yaca "Jachi we manjide!" tito mantanue. Seiton ocolabe meracari pato cuenta quito, "Nulaca telaquinayoe, nantari pasuwatuna!" tino joe.

3 - JERALELABE cuenta quintsan joe. Jesucristobesiri nenamin joyoeque. Jeralelabe tuca paniquitutori, inale pele tenca ichunae.

Nu tsanquitutori,

- Pansi chuchunae.
- Son tito nenachunae.
- Diosibe rocaino munarachunae.
- Diosichi Pilaca quirano munarachunae.
- Diosichi tsachilabe pelayaino munarachunae.

**Pansile yucanchi seiton ocolari manaman pasuwabi
jalainari, ¿ti quintsan jochuman?**

De repente pasuwabi manjalaichunada. Junni nuri manaman mantaquintsan jochunae jachi we manjideque. Junni nuca meralaquichunada.

Man pe poleca la Diosichi cosaca trabaja-quinato titiya tenhiyoe. Ticato duque seiton jonunca tenhiyoe lachi tencabi. Junni tenhiyoe yucanchi ocola joeque. Junni jun oratenan meracari pato, "Jachi jidel Nulari laca pasuwachun mantá itolajoe. Nulachi itoyoe. Jesucristo nuca fe loca joe; junni lari Crístochoi joyoe. Junni manjidel" tiyoe. Tsantinunsi jera sen manpatinue.

Nu yucanca, jungsi yachi seiton ocolaca, tsa tsanle telaquepotori, tsa libre jochunae. Junni nu tsanquino podeichunae. Diosi nuca tsanquisa munarae. Yucanla mantimini nube pato, "Podeituchunae" latichunae. Junni yalaca merátuna! Diosi yachi Pilabi payicaca meráto, yucanchi ocolaca tsanle quepode! Lanan in pilabi nuca tsanquenán payinayoe.